

Ingrid Kallstrom di Sweden ta desea di ripiti su experiencia di bolbe Aruba cu Festival di Buki

ORANJESTAD (AAN) – Ingrid Kallstrom tambe a participa den e Festival di Buki pa Mucha di Biblioteca Nacional, e aña aki.

Ingrid ta procedente di Sweden, y aunke el a bishita Aruba caba y Biblioteca Nacional, esaki ta e prome biaha cu e ta participa den un Festival di Buki di e indole aki.

Matutino DIARIO a entrevista e dama, en ocasion di e clausura di e festival, y el a indica cu nos festival di buki ta un evento nacional locual no tin na Sweden. “Nos tin festival den diferente ciudad, por ehemplo na Estocolmo, entre otro”, e dama a menciona.

El a mira e festival di buki na Aruba como un experiencia fantastico! El a haya e organizacion di Biblioteca Nacional tremendo, y


envolvimento di hopi boluntario, locual a capta su atencion, y ta haye sumamente bon.

“Ademas, bishita scolnan ta fantastico, pasobra di diferente manera, bay den klasnan ta algo diferente”, e dama a subraya.

Ingrid ta un Bibliotecario cu tin mas cu 25 aña trahando cu y pa mucha den diferente sorto di biblioteca, tanto grandi como chikito.

E mes no ta autor, pero el a bin cu bukinan di autornan di storia pa mucha cu bunita ilustracion, di autornan hopi reconocí na su pais.

“Mi a haci un presentacion hopi interactive. Mi a lesa storia na Ingles unda e muchanan tabata bati porta y habri porta. E muchanan a gusta e ilustracionnan hopi colorido y e manera con nan a participa den e contamento di



storia”, Ingrid a expresa.

Un di e bukinan cu el a bin cune a yama: “Do you know Pippi?” cu ta storia di un cabay y un mucha muher.

Durante diez aña consecutivo Ingrid a ocupa un funcion den “The culture House of Stockholm” y e ta un di e

iniciadornan y gran inspirado den e cambionan grandi cu a tuma lugar den e desaroyo di bibliotecanan infantil, na aña 2005.

Na su pais e ta un contador di storia y e ta motiva e muchanan pa bin Biblioteca scucha cuenta, pero e mes no ta escritor. Ademas e ta envolve muchanan di scol pa bishita Biblioteca.

Pa Ingrid e experiencia di topa cu autornan Caribeño y di Hulanda tabata fabuloso, y el a siña algo di cada un di nan. El a gusta e parti aki masha hopi mes.

Di Aruba mes el a expresa: “Esaki ta mi di dos bishita na Aruba. Mi a bin cuater aña pasa, no pa e Festival di Buki, pero only pa bishita e Biblioteca como cu mi ta Bibliotecario.

“Aruba is so beautiful! So nice, I love the people and the beaches” Ingrid a señala indicando cu e kier bin bek.

“Mi ta hopi contento di a wordo invita na e Festival aki cu a bira un experiencia fantastico pa mi, y mi ta desea di bolbe. Mi tin hopi pa conta na mi coleganan na Sweden. Comparti, mi ta kere ta hopi importante”, Ingrid a conclui.